



Siunnersuut uunga: Kommunit Namminersorlutillu Oqartussat missingersuutaat naatsorsuutaallu pillugit Inatsisartut Inatsisaat nr. xx, xx.xx.xxx 2016-imersoq.

(Aningaasaqarnermut Aatsitassanullu Naalakkersuisoq)
(Siullermeernera)

Demokraatini nuannaarutigaarput, inatsit manna aqputigalugu Naalakkersuisut anguniarmassuk pisortaqarfiit amerlasuut suleqatigiinnissaat, uanilu inatsimmi anguniarneqarmat pisortaqarfiit tamarmik atuinerat kiisalu inuiaqatigiit aningaasarsiornerata tamakkiisup ersarissarneqarnissaat.

Uani inatsimmi ujartorneqarpoq inuiaqatigiit assigiimmik isumaqarfigilissagaat assigiimmik piffissaq ungasinnerusoq isigalugu eqqarsalissasugut aamma siunissami aningaasarsiornikkut ajornartorsiulorfissatta ilaasa pinngitsoortinniarnissaat ujartussagippat eqqarsaatigalugit inuiaqatigiinni ukioqatigiikkuutaat immikkoortiterneri, Kalaallit Nunaanniit aallarartut, inunnik isumaginninneq, atuarfeqarneq peqqinnissaqarfillu pikkorinnerusunik sulisoqartariaqarnerat taakkulu periarfissaqarnissaat ikiorneqarsinnaanissaallu suliatik illersorneqarsinnaasumik ingerlatiinnassappatigit. Aamma minnerunngitsumik tungiuineq uninngaannartussaanngitsoq allatulli ajornartumik pitsaanerusariaqartoq.

Pisariaqarluinnaqqissaarpoq, missingersuusiortarnermut inatsisip sukumiisumik oqallisiginissaa. Attartortarnerup, aningaasaliisarnerup aama suliat piffissaq ungasinnerusoq isigalugu aningaasarsiornikkut atasinnaasut oqallisiginissaat pisariaqarpoq. Kisianni oqallinneq suli iluamik aallartinnngilaq.

Piffissaq ungasinnerusoq isigalugu suniartugununa?

Massakkut pingaaruteqarpoq annilaagalinnnginnissarput eqqarsariaatsinullu aalajangersimasnut qilarsunnginnissarput taamatullu piffissami sivikitsuinnarmi iluaqusiiisussanik iluanaarniannnginnissarput, paarlattuanilli eqqarsaatigisariaqarparput suna siunissami uangutsinnut pitsaanerpaanersoq kiisalu inuiaqatigiittut suut iluaqutissarsiviginerpaasinnaanerigut. Taarsigassarsiniarnerni tamani eqqarsaqqissaartariaqarpugut tamannalu qilanaarnarpoq taamaakkaluartorli peqataanik isumaqatigiissutigisariaqarparput, nutaaliorneq, inuussutissarsiutinik pioreersunik uummarissaaneq aamma suliat ineriartuutaasussat suminnaanniissanersut - qanoq aningaasalersuissaagut? Maassakkutut pissutsit iinnarnissaat periarfissaanngilaq ... taamaattumik ukiut 20-t qaangiuppata inuiaqatigiit qanoq ittuunissaat kissaatigaarput?

Peqataanik politikertut inuiaqatigiittullu paaseqqissaartariaqarparput innuttaasunut, ajornartorsiorneranni tamatigut ikiortarsinnaanngisatsinnut sunik piumasaqassanerluta -



inuiaqatigiinnut akisusarpoq innuttaasut inuttut aningaasarsiornikkullu ajornartorsiulersarnerat aamma piffissaagallartillugu ikiuisanngikkutta sulii akisunerusussaavoq.

Inuiaqatigiit timikkut tarnikkullu peqqissuuppata piffissaq ungasinnerusooq isigalugu aningaasarsorneq peqqinnerusussaavoq, kingunerissallugit ilinniarluarsimaneq kingornalu inuulluataarneruneq taavalu uummaarinnerulluni peqqinnerullunilu sulisartuuneq.

Tamatuma pisariaqalersippaa pisortat aningaasaataanik aqutsilluarnarunissaq aamma nuannaarutigalugu maluginiarparput matumani siunnersuummi sunniutissatut eqqarsaatitut ilaammat pingaarnersiunissamut periarfissaqarnissaq, allanngortiterisinnaaneq aamma pisortat ingerlatsiviini nutaamik eqqarsarnissaq kiisalu allaffissornikkut pisariillisaanissaq annikillisaanissarlu.

Periarfissaqalissaagut eqqarsaatigeqqissaassallugu aningaasaliissutigut iluaqutaanersut, atasinnaanersut aamma Kalaallit Nunaata ineriartortinissaanut eqqarsaatitsinnut ikorfartuinersut. Annertuumik iluarsartuussinissatigut kinguaattooqqavugut, ilaatigut ineqarniarnerup iluani, pinngitsoortissimasariaqaraluatsinnik. Taamaattumik kommunini Namminersorlutik Oqartussanilu aningaasanik tigoriaannarnik peqarnissamut piumasaqaat nuannaarutigaarput kiisalu sanaartugassat pilersaarusiorneqarnissaat sanaartorneqarnissaallu nutaamik avinneqartalissammata, taamaasiornikkut neriuppugut siunnessami ajornartorsiutit taamaattut pinngitsoortinneqarsinnaalissasut.

Piffissaq ungasinnerusooq isigalugu sanaartugassanut aningaasaateqarfiliornissaq isumassarsiatsialaavoq, kisianni aningaasaateqarfik suleqateqassaaq siunnersortinik politikkimut attuumassuteqanngitsunik imaluunniit aalajangiinikkut iluaqusersorneqartussaannngitsunik.

Allatut oqaatigalugu Inatsisartut Naalakkersuisullu aningaasaateqarfiup aningaasaataasa sumut atornerqarnissaannut aalajangiinissaanni tunngaviussapput siunnersortit pikkorissut eqqarsarluarsinnaasullu innersuussutaat.

Aaqqissuunniarneqartariaqarpoq politikerit uungaralaaq isigalutik politikikkut iluaquserniarlutik kissaataat pinngitsoortittussanngorlugit aamma aningaasaateqarfik aallartippat aningaasanik atuinnermut atatillugu ilannguttariaqarput paasiuminartumik atuinnissamut peqquserluttoqannginnissaanullu qularnaarutissat arlallit.

Takoreernikuuagut peqquserlullutik akinik aalajangersaasartut aamma pisariaqanngitsumik kisermaassipjaarlutik ingerlatsisut politikikkut kissaateqarsimanerit kingunerinik aamma politikerinit aqunneqartut aningaasat pisarsimapput taamaattumik aamma isumaqarpugut siusinnerusukkut misilittakkagut ilinniarfigisariaqarigut.

Inuiaqatigiinnguatut piffissap sivikitsuinnaap iluani politikikkut soqutigisat aallaavigalugit anguniakkanit taamatullu suliaqarfinni ikittuinnaat neqeroorfigisinnaasaanni



peqquserluttoqartarneranit ajoquseruminartuuvugut imaluunniit iluamik nakkutilliisoqarsimatinnagu pikkorliortoqarsimatilluguluunniit; sapinngisamik tamakku aaqqissuulluakkamik pinngitsoortinniartariaqarpagut.

Nuannerpoq takullugu pisortat missingersuutaat isornartorsiuerpalaartumik qiviarsinnaanngoratsigit.

Nuannerpoq sinaakkuteqalernissaq pitsaasumik kusanartumillu akileraarutitta atorpeqarnissaanntu qularnaarisunik.

Kisianni uani inatsisissatut siunnersuummi tunngaviusumik pineqarpoq, naalakkersuisut nikinneri tamaasa aningaasarsiornikkut ingerlavigineqalersartumut sillimmarternissarput. Demokraatini kissaatigineruarput sapinngisamik amerlanerpaat isumaqatigiissuteqarnerat tunngavigalugu aningaasanik aqutsissasugut taamaattumik aamma nuannaarutigilluinnarparput pisortat naalakkerneqarmata immikkoortunut pilersaarutinik ukiuni qulini ingerlaavartartussanik suliaqartalissasut.

Taamaasiornikkut inuussutissarsiutit, innuttaasut naalakkersuisoqarfiillu aqutsilluarnerusinnaalissapput qularnaannerusumillu ineriartorneq sanaartorneq, iliuuseqarneq aningaasaliisarnerlu pilersaarusiorsinnaalerlugit - ernummatiginagu naalakkersuisut nikinnissaat pilersaarutaareersullu sannikartillugit. Iliuserineqalersoq eqqornerpaajuvoq. Taamaattumik qujanaq.

Peqataanilli annertuumik piumasqaataassaaq pitsaasumik attaveqatigiittoqarnissaa, peqataatitsisoqarnissaa, partiit, pisortat aamma sulliviit namminersortunik pigineqartut sulliviillu pisortanit pigineqartut pitsaasumik isumaqatigiinniartalissasut.

Taamaakkaluartorli oqaatigeqqissavarput; isumagineqassasoq piffissaq ungasinnerusoq isigalugu pilersaarutit unammilleqatigiinnermut akorngusiissanngitsut imaluunniit pisortat aningaasaataannik atornerluinnermut aqqaataassanngitsut, pisortat pisisinnaassusaat nakkutigilluarneqassaaq taamatullu aamma namminersortut ikittunngooreersut aamma namminersortut siuarsarnissaat eqqarsaatigalugu nutaaliornissaq eqqarsaatigineqassaaq qularnaarumallugu naapertuuttunik kikkullu tamarmik akuuffigisinnaasaannik malittarisassiortoqarnissaa, pitsanngorsaangaagatta allanngortiteringaangattalu.

Tusassallugu pissanganassaaq Naalakkersuisut qanoq iliorlutik nunami maani piginnaanngorsaannissat aningaasanillu aqutsilluarnerusissamut piumasqaatit piviusunngortinniarneraat qularnaarniarneraallu. Iluatsissappat misilittakkat atorpeqarsinnaalissapput soorlu inunnik isumaginninnerup iluani, inunnik isumaginninnermut siunnersortinik, tarnip pissusaanut immikkut ilisimasalinnik/pikkorissaasunik tagiartuisartunillu amingaateqarfiusumi aamma sullivinni allani ilinniarsimasunik amingaateqarfiusuni. Imaannaanngissinnaavoq inuit inissitsiterluarnissaat neriuppugulli kissaatigisatsitut kinguneqarumaartoq taamatullu aamma qularnaarneqarumaartoq sulisunik



sulisitsiinnartarnissaamut pilersaarutip kiisalu pitsaasumik sulisussarsiortarnissamut pilersaarutip iluatsinnissaat.

Pillaasarnissamut tunngatillugu takujuminaappoq naatsorsuutiginngisamik aningaasartuutit suut kommuninut tuttarsinnaassanersut. Ukiuni qaangiuttuni Naalackersuisut aningaasaliisarnikuupput assersuutigalugu anorersuarnerani aseruaitersimasut iluarsaannissaannut, savaatilinnut immikkut aningaasaliisarnikuupput aamma oquttut suliarinissaannut immikkut aningaasaliisarnikuupput, innuttaasut ulorianartorsiortut ikiorniarlugit angalasartunut aningaasaliisarnikuupput il.il. Kontonik peqarpoq tassanngaannaq takkuttunut aningaasartuutinut ernummateqarani atorneqarsinnaasunik.

Ataatsimut isigalugu eqqaamassavarput inatsit atussagatsigu tunngavittut nunami maani piviusorpalaartumik akisussaassusilimmillu siunissami missingersuusiortalernissatsinnut, tamannalu qilanaaraarput. Aamma isumaqarpugut peqataanik eqqaamassagipput taamatut missingersuutinik aningaasartuutinillu aqutsineq unamminartoqarsinnaammat aningaasartuutitaqarlunilu, akissaqartinngisatsinnik aamma piginnaaneqarfiginngisatsinnik. Matumani annermik pivarput inunnik isumaginninneq, sorpassuartigut kinguaattoorfigisimasatsinni aamma eqaatsumik nutaaliortalu ingerlatsinissatsinnut pisariaqartitsiviusumi.

Tassani unneqqarilluta oqaloqatigiittariaqarpugut qularnaarlugulu aningaasat innuttaasunut pisariaqartitsisunut tuttarnissaat, allaffissornerulernermut tutsinnagit.

Missingersuutit malinnissaat ajunngitsumut alloriarnerussaaq siulleq.

Demokraatini neriuppugut inatsit atortussanngortinneqalerpat puigussanngikkipput allaffissornerujussuup akorngusiinninnissaa, kommunini Namminersorlutik Oqartussanilu innuttaasut sulisullu misigitillugit pitsanngoriartoqartoq, sullissinerit sukkanerusut, innuttaasut tamarmik eqqortumik sullinneqartut kiisalu kissaatiginarpoq inuutissarsiortut piffissaq qaninnerusoq isigalugu sinneqartoortassasut.

Taamatut oqaaseqarluta siunnersuut suliareqqitassanngorlugu Aningaasaqarnermut Akileraartarnermullu Ataatsimiititaliamut ingerlateqqipparput.